

Bosna i Hercegovina
Federacija BiH
Kanton Sarajevo
Skupština Kantona Sarajevo
n/r g. Elmedin Konaković, Predsjedavajući Skupštine

INICIJATIVA ZA DAVANJE AUTENTIČNOG TUMAČENJA ZAKONA O OSNOVNOM ODGOJU I OBRAZOVANJU

Dvanaesta radna sjednica Skupštine Kantona Sarajevo

Tražim autentično tumačenje Člana 7. Zakona o osnovnom odgoju i obrazovanju (Službene novine Kantona Sarajevo. Četvrtak, 15. Juna 2017. Br. 23.)

Član 7 (Upotreba jezika i pisma u nastavi)

- (1) Nastava i drugi oblici odgojno-obrazovnog rada u školi izvode se **na jednom od tri zvanična jezika konstitutivnih naroda Bosne i Hercegovine**, koji se imenuju jednim od tri naziva: bosanski jezik, hrvatski jezik ili srpski jezik

OBRAZLOŽENJE:

Smatram da ovaj član Zakona o osnovnom odgoju i obrazovanju, jednako kao i podzakonski akti po više osnova nisu u skladu sa Ustavom Kantona Sarajevo.

1. Ustav Kantona Sarajevo i Ustav Federacije BiH jasno i na isti način određuju tri službena jezika koji se jednako koriste u svim kantonalnim i entitetskim institucijama, te smatram da Zakonom o osnovnom odgoju i obrazovanju nije moguće ukinuti dva od tri službena jezika u procesu nastave u obrazovnim institucijama Kantona Sarajevo.
2. Član 7. Zakona o osnovnom odgoju i obrazovanju nije potpun jer ne precizira jasno na kojem od "tri zvanična jezika konstitutivnih naroda Bosne i Hercegovine" se nastava i drugi oblici odgojno-obrazovnog rada u školi imaju izvoditi, već prepušta tu odluku roditeljima što predstavlja svojevrsan oblik referenduma koji se na nivou Kantona, po Ustavu, ne može raspisivati.
3. Član 7. Zakona o osnovnom odgoju i obrazovanju ne koristi iste ustavne definicije tri jezika:

Ustav Kantona Sarajevo: Član 5a. **Službeni jezici** u Kantonu su: bosanski jezik, hrvatski jezik i srpski jezik, a službena pisma su latinica i ćirilica.

Ustav Federacije BiH: Član 6. (1) **Službeni jezici** Federacije Bosne i Hercegovine su: bosanski jezik, hrvatski jezik i srpski jezik. Službena pisma su latinica i ćirilica.

Definicija **“tri zvanična jezika konstitutivnih naroda Bosne i Hercegovine”** u Zakonu o osnovnom odgoju i obrazovanju ne samo da nije dosljedna, već se suštinski razlikuje od ustavne definicije **službenih jezika** u Kantonu i Federaciji.

Plašim se da ovo odstupanje nije slučajno i da se radi o namjeri da se korištenjem drugačijih termina u dijelu rečenice koji glasi **“na jednom od tri zvanična jezika konstitutivnih naroda Bosne i Hercegovine”** umjesto **“na jednom od tri službena jezika Kantona”** stvore uslovi da o jeziku nastave u obrazovnim institucijama Kantona Sarajevo naknadno odlučuje većinski narod u Kantonu što je upravo ono što se Ustavom Federacije BiH, Kantona Sarajevo i Aneksom 7 Ustava BiH nastojalo izbjeći.

O tome da li se jezik nastave u Kantonu Sarajevo izvodi na tri ustavom definisana ravnopravna službena jezika ne bi trebao moći arbitrarno odlučivati jedan dio građanstva. Mišljenja sam da je Instrukcija resornog Ministra roditeljima da se (kvazi)referendumski izjasne o jeziku nastave (koji Zakon prethodno namjerno nije precizirao) služila stvaranju privida demokratskog legitimiteta posve neustavnog zakona.

Ovako isplanirano nametanje **“narodne volje”** Kantonalnim obrazovnim institucijama (koje za rezultat ima nametanje jezika većinskog naroda kao jedinog jezika nastave u Kantonu Sarajevo) svojom formom, jednako kao i suštinom, ne samo da krši Ustave Kantona i Federacije BiH po pitanju definicije službenih jezika, ne samo da krši ustavom zagarantovana ljudska i građanska prava djece, građana i konstitutivnih naroda u Kantonu Sarajevo i Sarajevu kao glavnom gradu BiH, već, po mom mišljenju, predstavlja svojevrsan udar na ustavni poredak BiH. Zato tražim hitno autentično tumačenje Člana 7. Zakona o osnovnom odgoju i obrazovanju Kantona Sarajevo, a potom i hitnu promjenu ovog, po mom mišljenju, podvaljenog, sramotnog, diskriminatornog i protivustavnog zakona.

Sarajevo, 24.07.2019. godine

SAMOSTALNI ZASTUPNIK

amir Nikšić